

& Prophetes ; Les gens de bien iouyront éternellement des delices de Paradis sans discontinuation. Si la mer estoit ancre pour escrire les merueilles de mon Seigneur, elle finiroit plustost que les miracles : dis aux infidelles, ie suis homme comme vous, Dieu m'a enseigné qu'il n'y a qu'un seul Dieu, celuy qui croit en la resurrection s'estudie à faire de bonnes œuvres, n'adorez qu'un Dieu seul qui est sans compagnon.

*LE CHAPITRE DE MARIE,
contenant quatre-vingts dix-huict versets,
escriit à la Meque.*

AV Nom de Dieu clement & misericordieux. Dieu est renumerateur, conducteur (des gens de bien,) liberal, sage, veritable. Zacarie seruiteur de ton Seigneur s'est souuenu de sa grace, quand il a prié secretement son Seigneur & a dit, Seigneur mes os sont deuenus foibles, & ma teste est blanche de vieillesse, Seigneur ie n'ay iamais esté escondit en mes oraisons exauce ma priere, ie crains que celui qui me succedera ne peruertisse ta loy, donne-moy vn fils pour me succeder qui soit mon heritier, heritier de la lignée de Iacob, & qui te soit agreable. O Zacarie, ie t'annonce que tu auras vn fils nommé Iean, personne n'a encor esté nommé de ce nom, il

a dit, Seigneur, comme auray- ie vn fils ma femme est sterile & ie suis trop vicil? On luy a respondu, la chose sera comme ie te l'a dis, elle est facile à ton Seigneur qui t'a créé; il a dit, Seigneur donne moy quelque signe de la grossesse de ma femme; il luy a dit, tu ne parleras de trois nuits; alors il est sorty de son oratoire, & a fait signe au peuple de faire leurs oraisons soir & matin. O Iean comprends l'escriture avec affection, Nous luy auons donné dès son enfance les sciences, la clemence, la charité, la pieté, l'affection enuers ses pere & mere, & non pas la violence & la desobeissance, Nous auons beny le iour qu'il est né, le iour qu'il mourra, & le iour qu'il ressuscitera. Souuiens- toy de ce qui est escrit de Marie, elle s'est retirée du costé du Leuant, en vn lieu esloigné de ses parens, & a pris vn voile pour se couvrir, nous luy auons enuoyé nostre Esprit en forme d'homme, elle en a eu peur & a dit, Dieu me preseruera de toy si tu as sa crainte deuant les yeux; il luy a dit, ô Marie ie suis Messager de Dieu ton Seigneur qui te donnera vn fils agissant & prudent; elle a respondu, comme auray- ie vn enfant sans attouchement d'homme, ie ne veux pas estre impudique; il a dit, La chose sera comme ie tel'a dis, elle est facile à ton Seigneur, ton fils sera vne marque de la toute- Puissance de Dieu & de sa grace speciale enuers ceux qui croiront en sa diuine Maiesté: elle deuint grosse, & se retira quelque temps en vn lieu esloigné du peuple où elle sentist les douleurs de l'accouchement au pied d'vn palmier,

palmier, & dit, que ne suis ie morte, pourquoy ne suis-je pas au nombre des personnes oubliées? L'Ange luy dit, ne t'afflige pas, Dieu a mis vn ruisseau au deffous de toy, esbranle le pied de ce palmier les dattes tomberont, amasse-les, mange & boy, & laue tes yeux, dis à ceux que tu rencontreras que tu ieufne, & que tu as fait vœu de ne parler à personne que ton ieufne ne soit accompli; Ses parens l'ont rencōtée qu'elle portoit son enfāt & luy ont dit, ô Marie voila vne chose estrange, ô sœur d'Aaron, ton pere ne t'a pas commandé de faire mal, & ta mere n'estoit pas vne impudique; elle a fait signe à son enfant de leur respondre, ils ont dit, Comment parlera l'enfant qui est dans le berceau? Alors son enfant a parlé & a dit, ie suis seruiteur de Dieu, il m'a enseigné l'escriture, il m'a fait Prophete, il m'a beny en tous lieux, & m'a commandé de le prier, il m'a recommandé la pureté tout le temps de ma vie, & d'honorer mes pere & mere, il ne m'a pas créé ny violent ny malicieux, loüé sera le iour que ie suis né, le iour que ie mouray, & le iour que ie ressusciteray; Ainsi parla Iesus Fils de Marie avec verité, de laquelle vous doutez, Dieu n'approuue pas le discours de ceux qui disent qu'il a vn enfant, loüé soit Dieu, lors qu'il veut quelque chose il dit, sois, & elle est, il est mon Seigneur & le vostre, adorez-le c'est le droit chemin, il y a des personnes qui ont esté pour ce regard de differente opinion, mais malheur est sur les incredules, ils seront mal-heu-

reux au iour du Jugement. Les infidelles sont manifestement déuoyez du droit chemin, si tu leur presche les tourmens de l'Enfer & leur ignorance, ils ne t'escouterot pas. Nous sommes Maistres de tout ce qui est en terre, & ordonnons de toute chose à nostre volonté, ils seront vn iour assemblez deuant nous pour estre jugez. Souuiens-toy de ce qui est escrit d'Abraham, il estoit homme de bien & Prophete, il a dit à son pere, n'adorez pas ce qui ne void goutte, qui n'entend rien, & qui ne vous peut pas estre vrile, ie sçay ce que vous ne sçauetz pas, suiuez-moy ie vous conduiray au droict chemin, n'adorez pas le Diable il est desobeissant à Dieu; autremét ie crains que Dieu ne vous chastie, & que vous ne soyez au nombre des gens perdus; Il luy a respondu, O Abraham abhorre tu mes Dieux? si tu ne change de discours ie te lapideray, esloigne-toy de moy pour long-temps; il a dit, Dieu vous vueille inspirer, ie le prieray pour vous, il est tres-bon, il exaucera ma priere, qu'adorerez-vous lors que ie seray esloigné de vous? adorez Dieu mon Seigneur, & vos prieres seront exaucées; il s'est esloigné d'eux, & a adoré vn seul Dieu; nous luy auons donné deux fils Isaac & Iacob tous deux Prophtes, nous luy auons donné nostre grace, & vne langue eloquente & veritable. Souuiens-toy de ce qui est escrit de Moïse, il estoit homme de bien, nostre Prophte & nostre Messager, nous l'auons appelé du costé droict de la montagne de Sinai,

nous l'auons approché de nous, & luy auons enseigné nos secrets, nous luy auons donné par nostre grace speciale vn frere Prophete nommé Aaron. Souuiens-toy de ce qui est escrit d'Ismaël, il obseruoit exactement ce qu'il promettoit, il estoit Prophete & Apostre du Seigneur, il preschoit la pureré, & recõ-mandoit aux hommes de faire souuent leurs oraisons, & estoit agreable à son Seigneur. Souuiens-toy de ce qui est escrit d'Enoch, il estoit hõme iuste & Prophete, nous l'auons esleué en vn lieu tres-hault. Dieu a donné sa grace à ces personnes entre les Prophetes de la lignée d'Adam, entre ceux que nous auons fait embarquer avec Noé, entre ceux de la lignée d'Abraham & d'Israël, & entre ceux que nous auons assemblez & cõduits au droiẽt chemin; Lors qu'on leur racõtoit les miracles du misericordieux, ils se prosternoient & l'adoroient avec les larmes aux yeux; leur posterité a quitté leurs vestiges, elle a abandonné la loy, & a suiuis ses apetits, mais ils serõt precipitez dedans le feu d'Enfer, excepté ceux qui se conuertiront & qui feront de bonnes œuures, ils entreront dans le Paradis, & ne leur sera point fait d'injustice, ils entreront dans le jardin d'Eden, ce que le misericordieux promet est infailible, ils n'entendront rien dire dans le Paradis qui leur deplaise, ils entendront la salutation des Anges, & auront soir & matin tout ce qu'ils desireront, tel est le Paradis que Dieu donne à ses creatures qui ont sa crainte deuant leurs yeux. Je ne descends du Ciel

*Gelaldin
dit que
Mahomet
fit plainte
à l'Ange
Gabriel
d'auoir
demeuré
trop long-
temps sans
le visiter.*

que par la permission de ton Seigneur, il est maistre de nos actions au Ciel & en la Terre, & de tout ce qui est entr'eux, il ne t'a pas oublié, adore-le & perseuere en ton adoration, cognois-tu quelque personne qui se nomme comme luy? l'homme dit, Quoy, ie mourray & ie ressusciteray? Il ne considere pas que Dieu l'a créé de rien, i'assembleray vn iour les infidelles & les Diabes, ie les feray presenter à la porte de l'Enfer sur leurs genoux, & ietteray sur eux toute sorte de malheur par ce qu'ils ont augmenté leur impieté enuers leur Seigneur. Je cognois ceux qui meritent d'estre bruslez dedans l'Enfer, ils y seront precipitez, c'est vn arrest tres-justement rendu par le Seigneur; Je sauueray les gens de bien, & deffendray aux infidelles de se mettre à genoux deuant les Idoles, lors que les infidelles & plusieurs des fidelles ont ouïy prescher mes commandemens, ils ont dit entr'eux qu'ils estoient dans vn meilleur chemin que leur prochain, combien en auons nous exterminé auparauant eux aux siecles passez plus riches qu'eux & hipocrites comme eux? Dis leur, Dieu prolonge la vie aux deuoyez afin qu'ils cognoissent leurs erreurs, & qu'ils apprennent la cognoissance des peines qui leur sont preparées, ils cognoistront ceux qui seront les plus malheureux, & ceux qui auront esté les plus foibles en leur foy, & moins affectionnez au seruice de sa diuine Majesté. Dieu augmentera la foy de ceux qui suiuront le droit chemin, & ceux qui luy seront obeïssans jouïront de sa

grace. As tu considéré l'action des impies? ils demandés'ils auront des richesses & des enfans apres leur resurrection; Voulez-vous sçauoir le futur? voulez-vous capituler avec le misericordieux? il ne le fera pas. l'escriray tout ce qu'ils disent & accroistray leur miseres, ie leur donneray en ce monde ce qu'ils demanderont & resusciteront nuds (sans tresors & sans enfans.) Ils ont adoré les Idoles pour auoir leur protection; certainement ils ont erré en cette adoration, ils les renonceront & feront leurs ennemis au iour du Iugement. Ne vois-tu pas comme nous auons enuoyé les Diables contre les infidelles pour les seduire? Ne t'impatiente pas de les voir chastier, ils seront jugez au iour ordonné. Souuiens-toy du iour que j'assembleray tous les gens de bien en la presence de Dieu, & que ie precipiteray tous les meschans dedans l'Enfer, leurs prieres ne seront pas exaucées, excepté de ceux qui ont accompli les promesses qu'ils ont fait aux misericordieux, ils ont dit, croyez-vous que Dieu ait vn enfant? Vous dites vne chose estrange, peu s'en est manqué que le Ciel & la Terre ne s'en soient ouuerts, & que les montagnes ne soient tombées avec leur entiere ruine; ils appellent Dieu, Dieu le Fils, Dieu n'a pas affaire d'enfant, tout ce qui est au Ciel & en la terre l'adore, il sçait le nombre & le compte de toutes les choses du monde, les hommes seront assemblez deuant luy au iour du Iugement, & les vray-croyans qui feront de bonnes œuures seront

Voy Genaladin.

